

Roberts
bridge si-
ve Rother
bridg.
Bodiam.

Buckhurst
Baro.

Suffexiæ
Comites.
Vide Co-
mites A-
rundeliæ.

neschallierant hujus *Rapi*; hæreditas autem tandem per hæredes fœmellas ad Barones de *VVin-
defor*, & ad *Tirwhitthos* devenit. Deinde *Hother* tri-
partitis aquis *Pontem Hoberti* subit, ubi Aluredus
de *S. Martino*, regnante Henrico II, monasterium
posuit, & prætervectus *Bodiam* Lewkneorum fa-
miliæ & claræ, & antiquæ castrum à *Dalegrigis* ex-
structum, hic in Oceanum descendit. Maritimam
Suffexiæ oram jam legi, in mediterraneis nihil est
quod memorem, nisi sylvas & saltus longe late-
que patentes, reliquias celeberrimæ sylvæ *Ande-
ridæ* recenserem. Inter quas, ut ab occasu incipi-
am, notissimæ sunt *Foresta de Arundell*, *Foresta S. Leo-
nardi*, *Word Foresta*, *Asbdown Foresta*, sub qua *Buckhurst*
antiquæ familiæ Sacuilorum habitatio, (è qua
Thomam Sacuilem virum prudentem juxta ac
nobilem R. ELIZABETHA Baronem de *Buckhurst*
in nostra memoria erexit, in sanctius consilium
adscivit, in honoratissimum Georgianorum mili-
tum ordinem cooptavit, Angliæ Thesaurarium
constituit, & jampridem Rex Jacobus Comitem
Dorsettiæ creavit.) *Foresta de VVatendown*, & illa
de *Dallington* omnium minima.

Comites habuit Suffexia quinque ex familia de
Albineio, qui itidem Arundeliæ Comites dicti fue-
runt. Quorum primus Guilielmus de *Albineio* Gui-
lielmi Pincernæ Regis Henrici Primi & Domini
de *Buckenham* in Norfolcia filius; qui pro insigni-
bus usus est leone aureo erecto in clypeo rubro,
dictusque aliquando Comes Arundeliæ, aliquan-

do Comes Cicestriæ, quod in illis locis sedes præ-
cipuas habuit. Hic ex Adeliza filia Godfredi Bar-
bati Ducis Lotharingiæ & Brabantæ, vidua Re-
gis Henrici Primi, progeniuit Guilielmum Se-
cundum Suffexiæ & Arundeliæ Comitem pa-
trem Guilielmi Comitis Tertii, cui Mabilia so-
ror & una hæredum ultimi Ranulphi Comitis
Cestriæ peperit Guilielmum Comitem quartum,
& Hugonem Comitem quintum, utrumque
sine sobole defunctum, filiasque quatuor, quas
duxerunt Robertus Dominus de *Tatehall*, Ioan-
nes *Fitz-Alan*, Rogerus de *Somerey*, & Robertus de
Monte alto. Arundeliæ titulus postea regerminavit,
ut modo dixi, in *Fitz-Alanis*; Suffexiæ vero qua-
si oblitteratus jacuit ad nostra usque tempora,
quæ viderunt quinque *Radcliffos* è nobilissima
Fitz-Walteri familia (quæ à Claris stemma duxit)
eo honore illustratos; Robertum scilicet, Suf-
sexiæ Comitem creatum ab Henrico VIII, qui
duxit Elizabetham filiam Henrici Staffordiæ
Ducis Buckinghamiæ, è qua genuit Henricum
Comitem secundum, cui Elizabetha filia Tho-
mæ Howardi Ducis Norfolciæ peperit Tho-
mam, qui Reginæ Elizabethæ à cubiculis sine li-
beris obiit, Heros sane longe honoratissimus, in
cujus animo & prudentiam civilem, & fortitudi-
nem militarem una habitasse & Anglia & Hiber-
nia agnovit. Huic frater Henricus, illique ejus
unicus filius Robertus juvenis honoratissimus,
qui nunc floret, successit.

21. Hen. 8.

Parochias continet hæc Provincia 312.

Austra-
lium Sa-
xonum
regnum.

HActenus Suffexia, quæ cum Suthreia, Regnorum fuit sedes,
postea Australium Saxonum regnum, Saxonice *duð reaxan-pic*
dictum, quod anno trigesimo altero à Saxonum adventu inchoatum
ab Ælla, qui, ut habet Beda, *primus in gentis Anglorum regibus, cunctis au-
stralibus eorum provinciis qui Humbro fluvio, & contiguis ei terminis sequestran-
tur, imperavit*. Primus Rex Christianus erat Edilwalchus, Christo ba-
ptismo regeneratus, Wulphero Merciorum Rege præsentente, qui illum
à sacro fonte suscepit, & in adoptionis signum duas provincias dona-
vit, Vectam scilicet Insulam, & Meanuarorum provinciam. Sed cum
trecentessimus sextus ab hujus regni initio agebatur annus, Aldinio
ultimo rege ab Ina occiso, in Occidentalium Saxonum potestatem om-
nino concessit.